


**Declaración de las Naciones Unidas sobre los derechos de los pueblos  
indígenas  
-asháninka-**



**Declaración de las Naciones Unidas sobre los derechos de los pueblos  
indígenas (versión asháninka)**

**Obaemantakotiro Nampitsi Apotojetanchari Ekantakota  
Otampatiketi Inampi Asháninka**

Lima: Congreso de la República-Comisión de Pueblos Andinos, Amazónicos y Afroperuanos, Ambiente y Ecología : Centro Amazónico de Antropología y aplicación Práctica (CAAAP), 2007, 38 p.

Ed. sp-asháninka

Depósito Legal: 2007-12166

**Traducción:**

Pablo Jacinto

Nery Pachari

Yoni García Rivera

## Naciones Unidas Asamblea General

12 de septiembre de 2007

### Sexagésimo primer período de sesiones Tema 68 del programa Informe de Consejo de Derechos Humanos

#### Apotojeta maaroni Ikantakotiro Apototachani Otampatika Atiripee

**Alemania, Bélgica, Bolivia, Costa Rica, Cuba, Dinamarca, Ecuador, Eslovenia, España, Estonia, Finlandia, Grecia, Guatemala, Hungría, Letonia, Nicaragua, Perú, Portugal y República Dominicana: proyecto de resolución**

#### **Obaemajantero Nampitsipe Apotojetachari okantakota otampatika inampi asháninkapee**

Apotojeta Maaroni,

Asankenatajero okante papeerite 1/2 apotojeta otampatika atiripee, 29 jonioki 2006, apotojetani abisabakajero sankenatachani Obaemantakotiro Nampitsipee Apotojetachari ikantakota otampatika inampi asháninkapee,

Ikenkishirajero ipapeerite 61/178, 20 diciembreki 2006, ikenkishirianajero ameniro kameetsa meeka Obaemantakotiro okanta optimatsi osheki osarenti asampitanajeri choorani jaoka ikante, meeka aisati otsonkanajeri okante Obaemantakitiro osarenti intanajerori apotojeitani,

Abisabajero Obaemantakotiro Nampitsipee Apotojetachari ikantakota otampatika inampi asháninkapee meeka osabikaje janta otsipata meeka sanknaripe.

## OTSIPATA

### **Obaemantakotiro Nampitsi Apotojetanchari ekantakota otampatiketi inampi asháninka**

Apotojeta Maaroni.

Ojebate intajantari sankenarenti Nampitsipee Apatojetaehari kameetsari otsoehero amenabentajerori okantiri sankenarenti,

Omaperotachea asháninkapee ashitarori inampipe ari omonkarabakaeya eyojetiro meeka okarate tampatikati ipinkatsaeteri,

Omaperotachea aisati choora maaroni nampitsipee saekatiri otme yaminero timatsiri yamitakoetari aisati ehoora ashitarori atiripee,

Omaperotachea meeka maaroni ikantakantasanojetiri nampitsipe antero ojebate isaikiri asháninkapee jero yokasanojetiri ibabani. iyotaperojetero kariperori. otme pashine yokasanojetiri yamitajetiri kariperori,  
Omaperotacheari. okarati itampatikati. irashi asháninkapee otme ajero maaroni ipinkimaeteri,

Akinkishiriakotajero antaetakiriri asháninkapee ashitarori inampi iñashitaro jantabaetasanotajanteri yapitajetsiri ipatsite okarati kantakosanobenteriri itsañasanotakaro meeka tee ikobe injantero choora okarati kobataehari taani iriro okarati ikobiripe,

Akakotere kobatachani pinkatsatante otampatikati asháninkapee ashitarori okarati yametajari aañee kinkishiriajante otampatikati ipatsite obiraeya pinkatsatante.

Akakotere aisati okobaeha pinkatsatante aenijantero tampatikatiri akinkishiriakotajero ibetsikakotajero anampsitsite asháninkapee aisati choora pashine amenabentajerori.

Janterori asháninkapee ashitarori inampsitsite apatojeta ijebataje ikinkishirianaje optimimotajeire yametari okantea otsonkatea pinkimatantero.

Akakotere yaminakoetajero maaroni asháninkapee okarati pokajatsiri iñashirinkakojetiri ipatsite otsimimotera ijebate ikitsatanchari yametari ikinkishiriakotajero kobatachajari okarate inintaje.

Akakotajere apinkatsatero iyotantajero ametaritaantsi ojebate ametakotajantsi omonkarabakajeya okarati tampia aninkatari.

Meeka amonkaratajero aajero kipatsipe obira ashi asháninkapee saekantarori anintajanteri ojebate akimatsatabakajeya akarayene aisati nampitsipe atsipanampitari osaiki,

Ayotanajero okante otampatikati kantakobentajante aisati atiripe ashitarori inampsitsite yoejatero intsiparaero ojebate obamitajante yashi atomipee kantasankobentiriri,

Anintakajeyaro otampatikati kinkishiriajante aisati pashine obamitajantanajeri yashi asháninkapee irotake otime pomerintsitachari maaroni nampitsikipee

Anintakajeyaro aisati maaroni papeeri kinkishiriajateni kantakobentarori amashitea yamitakotajero aisati choora maaroni okarati asháninkpee oshintsitanaje aisati amenakobentanajeri atiripeci,

Ayotanajero sankenarenti Nampitsipee Apotojetachari, Akakobetakajetaro Antearo Otampatikati Opinatajantea, Ametajari aisati Akakoteroni Antearo Otampatikati Atiripe aisati Kameetsataketi, jero Obaemantakotiro ñaanti inijantajetiro ibetsikajoetakiro ikantajeite otime tampatikari maaroni saikajetatiri tekatsi shintsibentanteri otime isaikabajeite katsi oejanaterone ijebatakejero yametari,

Meeka ayotakotajero okarati inijantajeteri Obaemantakotiro otime apajachero tekatsi aparoni kantashitachari otime omonkarabakajeya kantakobentajetanteri otampatikati antearoni,

Akakotero iyotajetakero kantakobentiriri asháninkapee enijantajetiro Obaemantakotiro amitakotajante maaroni aminakobentajerori aisati nampitsipee, otime pinkatsatante aerori otime pinkimatante aparoni kameetsari shiritantsi,

Akakotere nampitsipee itsochero okarati ikinkishiranajero ipinkatsatajero okarati kantakobentajerori asháninkapee maaroni kantachari tampatikati antearonipe, choora inanitanajero tampatikati, aisati asampiteripe nampitsipee akakoterone,

Apotsotakojetero ashitaro Nampitsipee Apotojetachari itscherone kameetsa aisati yamabentakojecharo kantakobentirori tampatikati asháninkapee,

Akakojetero meeka Obaemantakotiro oenejanteri aparoni obakera iyotajanteni amabentakotajecharo kantakobentirori asháninkapee aisati ijebatanajéro iyotaje okoberi pashine Nampitsipe Apotojetachari jaokarika,

Ayotajero aisati akakojetero maaroni atiripeci kantakobentirori tekatsi pinkimatajeite maaroni okarate tampatikajeketi iyoetajero marooni saikatajetiri asháninkapee kameetsari ijebatajetero irañee maaroni nampitsipee,

Aisati ayotanajero okarate saekatsini asháninkapee te okemetajari maaroni nampitsi otime iyotajero isabikantaje kinkishiriantajero amitajeitari,

Obaemantakotajero enijantajetiro Obaemantakotiro Nampitsipe Apotojetachari okarate otampatikati kantakobentajetirori asháninkapee otime ameniro aparoni kinkishiriantajeite pinkatsatajeiteri akakojeteri:

## Abakojetiro I

Asháninkapee timatsi otampatikati, inampsitsite kantakobentajeiteriri atiripe anintajeitaro iyojetiro sankenatakotachari pashine Nampitsipe Apotojetachari, Obaemantakotiro Antearoni Tampatikati Atiripe aisati kantakotantajeteri obasanokotajeiteri tampatiketi kantakobentajeteri.

## Abakojetiro 2

Nampitsipe aisati atiripee okanta okemetari saikajetaeteri maaroni inampsitsite katsi shintsibentajeteni aisati katsi pinkimatereni okarate ashitari ametari jero ipajitari,

## Abakojetiro 3

Asháninkapee ashitarori inampi otime kantakobentajeiteriri. Choora otampatikati katsi obasantikajeiterine osaike anintabajecha ojebate apatojetani ametajeitarí

## Abakojetiro 4

Asháninkapee otime otampatikati kameetsa. otime tampatikanti isabikaje añee antajeitero. ari ametani iriotake antero okate okobire

## Abakojetiro 5

Asháninkapee otime otampatikati amabentakotajeitaro aisati ashintstanaje osaikantari ikimpojero okarate ametari okantea ijebatantajeyari iyotaje kameetsa nampitsi.

## Abakojetiro 6

Maaroni atiri otime kantakobentajetiri itsimantari ipajitari.

## Abakojetiro 7

1. Atiripee otime otampatikati añee maaroni ikinkishiriantajeni amabentakotajete aparoni atirini.
2. Asháninkapee otime otampatikati añee anintabakajeitea tekatsi aparoni shintsibentajerone iñashirinkajerini pashine jananekipe pashine apotojeta

## Abakojetiro 8

1. Nampitsipe aisati atiripee otime otampatikati eero iñaashitajero yokakojeteni ametari.
2. Amenabentajerori Nampitsi amabentakotajetiri otime aminero katsi obasankitajereni:
  - a. Maaroni antajeri okarati aňantari inampsitsite aisati atiripe otime iyotero opinatachara ametari iyotantajeitariri;
  - b. Maaroni timimoteriri okarati isaekantari ipinajanteri ipatsite;
  - c. Maaroni ashintibentajeiteri okarati obasanokitajeiteri tampatikati;

- d. Maaroni shiyakotajariri shintibentajanteri;
- e. Maaroni sankenakotajetanteni meeka otime obinkateriri asháninka

### **Abakojetiro 9**

Maaroni asháninka aisati inampitsite otime otampatikati ibakojeteri aparoni apatojetani iytero ametajeitari apotojetachari tekatsi pinkimajeiterone okarati antire otampatikati asháninka

### **Abakojetiro 10**

Asháninkapee tekatsi okajerine ipatsiteki isaekantajeri aparoni okanta arika ikinkishiriakotajetero ijataje pashinekipe kipatsi ipaajetapajeri

### **Abakojetiro 11**

1. Asháninkapee otime otampatikati antero okarati ametajetari ikempoyeroni obeshirijanterini ari ijebataje aminero shiyakanteripe isaikaje tonkitsipee ikantajeiteri oetasanotsiketi.
2. Amabentakotajeiteriri ari meeka aminakerine okantea asháninkapee ijebataje pinkatsatanten iyotaani anintajeyaro katsi ñashirinkirine okarati yametaripe

### **Abakojetiro 12**

1. Asháninkapee timatsi otampatikati onijatero okarati iyoteri ametari kinkishiranajetiro obamitanajemi ayero akempoyerero okarati meeka iyotire atiripee.
2. Amabentakotariri ari meeka amitakotakeri okarati ametari inijantajero okanta iyotantajeiteriri asháninkapee matsu iyotajeteri atiripee.

### **Abakojetiro 13**

1. Asháninkapee otime otampatikati aenijantero okarati iyoteri meeka ashitarori icharine kimpoyeroni iñaane ametari kinkishirajeteri maayenitante obajiropee isaekantari otishi otime ikempoyerero.
2. Amabentakotajerini otsipatanajiari oenejanteri ojibateni okarati ametari asháninkapee iyoetakotajancharire irootake enintanteari obajikoterone pashini

### **Abakojetiro 14**

1. Ashitarori asháninkapee inampitsite otime aminero okanta obamitante ojebate kameetsa iriotajero añaane iñabaetaje kameetsa.
2. Maaroni asháninkapee otime iyotajeero iñabaete ineanekipe aisati jananekipe iyotabajero amakobentajerori tekatsi pinkimantajante.
3. Amakobentajeriri meeka iriotake otimache ametakoteri okanta jananekipe iyotaje ineanate okanta obametajeiteri iyotajero ineanekipe ibamitajante aisati isankenatanajante aneane

**Abakojetiro 15**

1. Ashitarori asháninkapee anampsitsite otime otampatikati isankenatakotero ametari kempojetarini sonkatanteni okanta ibaemantakotajero.
2. Amakobentajeriri aminero jaoka ikantajero ametakoteri asháninkapee okantaje oenijatajero iyotajeri otsonkabeta pinkimatajante iyotajeitero aisati choorani maaroni isaice atiripe

**Abakojetiro 16**

1. Asháninkapee otme otampatikati ibaematajero okarati iyoeteri iriori ineanike tekatsi pinkimatajanterori.
2. Amakobentajeriri ari yaminajero okanta enijantantarori okarati ametari tekatsi itsikeriri otme iyotajero okarati obametanteari ashi asháninka

**Abakojetiro 17**

1. Atripee aisati asháninkapee otme otampatikati anintajaeyero okarati antaberenti opire pashini nampsitsipee.
2. Amakotabentajeriri. asháninkapee yakakojetery poñenkari aminero okanta amabentakojetari jananekipe choora obasankenateri maaroni antaberenti kobenkachari obamitanajante obinkatetsijetarirts kinkishiriajantero ayotajero timatsi kantjakobentajaeiri.
3. Atiripe timatsi otampatikati eero ebasantankitajeritsi okarati antabajire pimantajaneti ari pinkimatajante

**Abakojetiro 18**

Asháninkapee otme otampatikati ijate iñabaete ikantakobentero inampsitsite okanta ijebatajanteari isaikajera okante okoberi anteari

**Abakojetiro 19**

Amabentakojeteri antero ametakotajante ashi asháninkapee ikobajetire itsipanteajeari otimanteari kameetsa kinkishiriajante

**Abakojetiro 20**

1. Ashitarori asháninkapee otme ikimpoyeroy ijbate kameetsa yapotojeteacha yaminero jibanteanten okarati pashini ametari.
2. Ashitarori asháninkapee inampsitsite saekatiri osamani otme iyoetakoeten kameetsaperote aisati ampajeteani ikemetaroje.

**Abakojetiro 21**

1. Ashitarori asháninkapee inampsitsite otme otampatikati katsi pinkimatajaeteni otme anintajante iyotaenteni aneantari amabentakojeteanteri.

2. Aminajerori omonkarataja okameetsate yantaeteri ari ipashitake kobitachari maaroni tsinanepe ebankaripe jananekipe atiripe kaari timimoterone asháninkape.

### **Abakojetiro 22**

1. Jeri ipabajitari amitakotanteri antearikona ebankaripe tsinanepe jananekipe kaari iyobaitajatsine meeka asháninka enijantaetsine Obaemantakotiro.
2. Aminabentajerori akakotero maaroni asháninkapee ibetsikakotero jananekipe tsinanepe asháninka yanitaiyero eero ipinkayeteari

### **Abakojetiro 23**

Asháninkapee otme otampatikati yanter oameetsa ojebatanteari isankenatakotajero anintajantea ibanko isaikantare ipijojeta

### **Abakojetiro 24**

1. Asháninkapee otme yashitari yabentaro otme ikempoyer inchashi poshiniri mapí aisati marereakini aminakotero abenteantinkari asháninkapee aisati kaatsi pinkakoterone yabentaro ari okantaki yabintante.
2. Asháninkapee otme otampatikati ishintsitakajero okarati yabentaro iyotajante kinkishireante aminakotsirre yaminero okanta ojebate tampatikati

### **Abakojetiro 25**

Asháninkapee otme atampatikati ikempoyer ijbatakajero yashirari ipatsiteki isaekantari enijate inkarite okarati ipimanteri yaminero ikempoyer yashi icharine timajatsine

### **Abakojetiro 26**

1. Ashitarori asháninkapee otme otampatikati otme ipatsite isaikanteari aisati okarati ibanitajanteari yakeriori.
2. Asháninkapee otme ijbate yaminero ipatsite okarati yakotakire enintakaro ibaninte yashocharo ikemita pashinipee otme kipatsi.
3. Ametakobetajeteri yamakobenteari maaroni choorani ipatsite isaikanteari iyotantaecharori pinkatsayetero okarati yametari isaike otme yametari asháninkapee yanteri

### **Abakojetiro 27**

Ametakobetajeteri yameitakojeteri maaroni asháninkapee okoñate iyotajetero kameetsa koyatajeteri otimatsi kantakobenteriri yametari isaeki ipatsiteki okantea yakoeteri maaroni kipatsi asháninkapee jaokarika isaike maaroni asháninkapee yametakaerori irashi otme yokabenteari antanteajeri

## Abakojetiro 28

1. Asháninkapee otime iriori otampatikati ibetsikakoeteri isaikanteari eero ipinabentaero iroperosanotatsi kipatsi isabikanteari iñashirinkajeiteri erorika ikamatajeiteri
2. Aririka kobirori iyompariteari jeri yakakeri ipiri ipatsite yashitari omonkaraeya otimimoteri ipinateri yashitari okimotakeririka

## Abakojetiro 29

1. Asháninkapee otime yamakotearo yaminero okarati timatsiri aninkaeteri intamiki kipatsi. Ametakobetajeteri otime ikinkishiriakoteajero asháninkapee yamakotearo aisati ikempoyer katsi pikemajanteri pinkimatajante
2. Ametakobetajeteri otime yaminero akantea ikantakobenteari katsi otime kobenkajanteari ipatsiteki isaikanteari asháninkapee tekatsi akerini iyotanteari
3. Ametakobetajeteri choorani otime ikantakobenteari okantea yamitakojeteri isaike kameetsa añanteantsi yashi asháninkapee tempa oñashirinkakeri kobenkari meeka yantero ametakotajeante yashi nampitsi asháninkape

## Abakojetiro 30

1. Eero yantaetajero yanteri soraronipe ipatsiteki asháninkapee arika ikoiro asháninkapee aritake yantaetakero jaoka otime ikoberi asháninka otime ikantearo iroka nokoi nantaetearo
2. Ametakobetajeteri yantearo yompariteantsi asháninkapee kobajateri yantere okarati okimotajeriri asháninka kantakobenteriri tekerata yantearo ipankite ipatsiteki isaike yantero ikoberi soraronipe

## Abakojetiro 31

1. Asháninkapee otime otampatikati yamakotearo yaminero ijebate timimotajeiteri yashitari iyootane yametaetari yantaetsiro iroperori iyotaanetsi ashitarori otimanteari intami iyootani kinkishiriantero ipotsotakoetiro neatsatantsi beshiriajantsi manatajantsi okarati iyojeteri asháninka. Aisati otime yamakotearo okantea ojebate kameetsa irootake ashitarri iyotani yametaetari saekantarori yametari intamiki.
2. Atsipateari asháninkapee ashitarori inampi, Ametakobetajeteri yantaero yamakotearo iyotaetero okarati yanteri kantakobentajateri

## Abakojetiro 32

1. Asháninkapee otime otampatikati yanteri okarati kobatachari ojebatanteari yanteri ipatsiteki aisati pashini ipimantere.
2. Ametakobetajeteri yanteri sampitajanteni yametakoeteri okameetsate antabaerenti yashi asháninkapee ojebate yapotojeta otime yakakotere iyotantearori isankinatakotero jebatajantero isaekantari aisati pashini

ipemantere maaroni ijebate okarati timimoterire imapinite pinatachari onijateni pashinitera.

3. Ametakobetajeteri otime yaminero okantea ipiyajirire okarati yapitsatakeriri aisati meeka okantea okimotajeari asháninka otimanteari irekite yakabakaeya okarati yametari

### **Abakojetiro 33**

1. Asháninkapee ashitarori inampi otime otampatikati yantero yashi yoñarontea ipajitari okarati yametari kimsanteari katsi tsikeriri okantea iyoterore aminariri ametakobetajeteri.
2. Asháninkapee otime itsonkajero yantero shaakanteni ijebatero isaekanteari kameetsa yaminero okarate okimotajeriri ojibatanteari

### **Abakojetiro 34**

Asháninkapee otime otampatikati enijantearo ijebate aisati yantero okarate shaakanteni yashitari aisati yametari koñatajeari timatsiri isankinatakotero iyoetakoeteari maaroni nampitsikipee timatsi kantakobentanteari itampatikati atiripe

### **Abakojetiro 35**

Asháninkapee otime otampatikati yokajeiri atirini poñenkaripe jaokarika inampi isaiki

### **Abakojetiro 36**

1. Asháninkapee tsipariachari jaokarika isaeki antearoni otime yaminero kameetsa ojebate iyomparitea yamitakoetanteariri optimimoteri irekite aisati yametari maaroni sakatire asháninkapee obirapakanta isaikantaripe.
2. Ametakobetajeteri ikinkitsatakaeri namitakoteme maaroni asháninkapee. yakanakero kantajantea okantea katsi kobinkatatsine otampatikati

### **Abakojetiro 37**

1. Asháninkapee otime otampatikati yantero apototantea ineabentakotearo kobatajachari yakabakaeya okantea iyoetajeri ipinkatsaeteri maaroni kinkishireakari aisati pashini antajanteari.
2. Tekatsitempa meeka irookatake Obaemantakotiro inijantearo okantashitea otampatikati ashitarori inampitsite sankinatakotachari pashini obetsikanti aisati pashini antajanteari.

### **Abakojetiro 38**

Ametakobetajeteri aisati aminakotero okantero ametakteanteni yashi asháninkapee nakotene pikobiri maaroni obakotachari aritantearori koñatatsiri meeka Obaemantakotiro

### **Abakojetiro 39**

Asháninkapee otíme otampatikati yaminakotero ojebate kameetsa ipanajeiteri aisati amitakotajanteri aisati poñenkaro okantea antearoni yanitaeyaro okarate tampatikati koñatakotatsiri meeka Obaemantakotiro

### **Abakojetiro 40**

Asháninkapee ashitarori inampi otíme itampatikati yoyaetero omonkarabakajea aisati abetsikero pashini Ametakobetajeteri otíme aminero kameetsa kantajanteari choorani yapatotea okemita abetsikakotero okarati ametari obakotachari yashi asháninkapee koberori kantakantsi antearoni tampatikati atiripe

### **Abakojetiro 41**

Jebatayetatsiri yotatsiri antearoki Nampitsipe Apotojetachari aisati pashini iyotajanteri pankotsini amenirori yamitakotene okantea kameetsa enijantaetaro meeka oshebatateari okarati kobiteachari Obaemantakotiro ashitaru anitakotantatsiri. Meeka aminero otsimanteari amabentearo asháninkapee yantereo okarati yanterira

### **Abakojetiro 42**

Nampitsipe Apotojetachari. otsipanampira okanteachani aneanaterora aminero okantakota asháninkapee ojebataje isaekira amitakoteriri yantereo pinkatsatero okarati ikoberi koñatatsiri Ametakobetajeteri. yaminakotero ibakoetsiro papeerite meeka Obaemantakotiro

### **Abakojetiro 43**

Tampatikati timatsire meeka Obaemantakotiro iyojetiro koñatatsire yantereo intintakaero ikanta yañee isaekinta yaninta asháninkapee ipatsiteki

### **Abakojetiro 44**

Maaroni tampatikati kantakobenterori iyotaetakiro okoñatakotsi meeka Obaemantakotiro akantakotero maaroni omonkarabakaeya shirampari aisati tsinanepe asháninka

### **Abakojetiro 45**

Tekatsitempa timatsiri ibakoetsiro meeka Obaemantakotiro iñashirinkirine okarati kantakobenteriri meeka asháninkapee okantea otíme ipokatsiniri

### **Abakojetiro 46**

1. Tekatsitempa yokataeteri kantachana meeka Obaemantakotiro okanteri amitakoteiri yantereo pashini antajanteni kobatachari aparoni sankenarentsi Nampitsipe Apototachari aisati okante eero añaširinkire okarati timimoteiri yashi onatsi opinkatsatero pashini nampitsiteki.

2. Sankenatakotachari ibakoetiro otampatikati otime meeka Obaemantakotiro ipinkatsaetero maaroni kantakobentsiriri otampatikati atiripe. Otime kantakantaitsire ibitsikero tekatsitempa pinkimatanteni antaeroni kantajanchari tampatikati atiripe. Otime otsochero maaroni pashini nampitsi iyotakoetero ipinkatsaetero otampatikati anintajanteni okimoteariri okarati kobatachari isaeki asháninka
3. Ibakojeitero kantaetsiro meeka Obaemantakotiro koñatakotsi ibitsikakoetero okameetsate yanintaro apototajante pinkatsatantsi amonkarabakaeya tampatikati atiripe. tekatsi pinkatsari aminero kameetsa shiritantsi